



Број/ Број :
Сарајево/ Сарајево: 16. 2. 2009. године

KOLEGIJU OBA DOMA
PARLAMENTARNE SKUPŠTINE BiH

ZAJEDNIČKOJ KOMISIJI ZA EVROPSKE INTEGRACIJE

ZAJEDNIČKOJ KOMISIJI ZA LJUDSKA PRAVA, PRAVA DJETETA, MLADE,
IMIGRACIJU, IZBJEGLICE, ETIKU I AZIL

KOMISIJI ZA VANJSKE POSLOVE
PREDSTAVNIČKOG DOMA

Z A B I L J E Š K A

sa sastanka članova Zajedničke komisije za evropske integracije s Jelkom Kacinom, poslanikom u Evropskom parlamentu, u svojstvu izaslanika Hansa Gerta Potteringa

Sastanku su prisustvovali članovi Zajedničke komisije za evropske integracije: Halid Genjac, Ivo Miro Jović, Alma Čolo, Zoran Koprivica, Selim Bešliagić, Milica Marković i Hilmo Neimarlija, kao i predsjedavajući Zajedničke komisije za ljudska prava, prava djeteta, mlade, imigraciju, izbjeglice, etiku i azil, Sadik Ahmetović, te sekretar Komisije Emina Jahić, stručni saradnik u Komisiji za evropske integracije Vladana Lučić i predstavnici Odjela za odnose s javnošću PSBiH.

Na početku sastanka, prisutnima se obratio Halid Genjac, koji je, u ime Komisije, pozdravio Jelka Kacina i zahvalio mu na doprinosu u vezi s Rezolucijom o Srebrenici koju je usvojio Evropski parlament. On je podsjetio i na nedavni Interparlamentarni sastanak, koji je održan u Briselu, na kojem je bh. delegaciji stavljeno do znanja da je došlo do zastoja u reformama u BiH i da je BiH s mjesta broj jedan na listi za liberalizaciju viznog režima dospjela u posljednju grupu. Predsjedavajući Genjac informirao je člana Evropskog parlamenta da je, povodom izraženog nepovjerenja Evropskog parlamenta u sistem personalizacije putnih isprava u BiH, Zajednička

komisija za evropske integracije zatražila da oba doma PSBiH na dnevni red hitno stave „Informaciju o provođenju obaveza iz Mape puta za liberalizaciju viznog režima“, kao i održavanje tematske sjednice na kojoj bi predsjedavajući Vijeća ministara BiH podnio Izvještaj o ispunjavanju obaveza iz Sporazuma o stabilizaciji i pridruživanju i provođenju prioriteta iz Evropskog partnerstva sa BiH.

Jelko Kacin zahvalio je članovima Zajedničke komisije, naglasivši da je saradnja sa Zajedničkom komisijom za evropske integracije kontinuirana. On je prisutne upoznao s aktuelnim dešavanjima u Evropskoj uniji i posebno naglasio da se zbog nedavne „plinske krize“ u Evropi Turska nametnula kao važan strateški partner EU. Specijalni izaslanik Evropskog parlamenta upoznao je prisutne i o Prijedlogu Olija Rena o medijaciji u vezi s teritorijalnim problemima Slovenije i Hrvatske, mogućem skorom ulasku Norveške u monetarnu uniju, te o mogućnosti da Island uskoro postane novi član EU s obzirom na kontinuitet širenja EU u svakom mandatu.

Govoreći o zemljama zapadnog Balkana, on je ukazao na probleme koji se odnose na spor u vezi s koridorom 10 na relaciji Grčka–Makedonija, problem Kosova, itd. Govoreći o Bosni i Hercegovini, on je rekao da je jedan od glavnih problema u Bosni i Hercegovini „pitanje jezika, jer političari u BiH ne razumiju šta im Evropa govori, odnosno da rečeno tretiraju kao šifre koje ne znaju dekodirati, te da je s tim u vezi, prilikom nedavne posjete Zajedničke komisije Briselu, korišten manje diplomatski rječnik“.

On je također rekao da Evropa nastavlja da djeluje zajedno sa Sjedinjenim Američkim Državama, što je na neki način i garancija Republici Srpskoj da neće doći do narušavanja dejtonskih principa.

Kacin je naglasio da se sve stranke u BiH moraju saglasiti o pitanju ukidanja viznog režima, jer bi se tako stvorila pozitivna energija za rješavanje težih izazova koji stoje pred BiH, kao što je promjena Ustava BiH. On je također poručio da u BiH stvari ne treba rješavati na način pobjednika i gubitnika, nego da postoji mogućnost, kako je to i među evropskim partnerima pokazano, da u svakom problemu obje strane budu pobjednici.

Zoran Koprivica je, između ostalog, rekao da Slovenija kao poznavalac prilika na prostoru zapadnog Balkana ima ulogu predvodnika u procesu priključenja zemalja zapadnog Balkana EU. U tom kontekstu predložio je pokretanje inicijative kojom bi svim zemljama zapadnog Balkana bio dodijeljen status kandidata. Govoreći o evropskoj budućnosti Bosne i Hercegovine, on je posebno naglasio da se buduće ustavne promjene moraju odvijati uz poštovanje principa ravnopravnosti.

Sastanak je završen zajedničkom ocjenom da je strateški evropski interes da sve zemlje zapadnog Balkana što prije uđu u Evropsku uniju, te da Bosna i Hercegovina treba prihvatiti priliku koja joj se nudi ali da mora mnogo toga uraditi sama u procesu ka evropskim integracijama, uvažavajući iskustva i dobronamjerne savjete Evropske unije.

Zabilješku pripremila:

Vladana Lučić, stručni saradnik u Komisiji

